

PARROCCHIA DI S. MARIA ASSUNTA
BASAGLIAPENTA
(I) 33031 BASILIANO

All'Illustrissimo Signore Lizzi dr. mons. can. Italo di Fagagna, di Manzinello, della curia cattolico-romana di Udine, ordinario di psicologia nel seminario diocesano (esistial ancjemò?), guardiano dei fascicoli personali delle persone inquisite & sospette, segretario generale del Sacrosanto Sinodo Diocesano Udinese V, controllore delle soffiare dello Spirito sulla chiesa friulana ecc. ecc.

Signor cancelliere,

anche se sei schiavo della legislazione della tua (e mia?) baracca, so che sei abbastanza onesto e che lasci spazio anche al dissenso, magari mettendo il tutto con pudorosa carità nel "fascicolo personale".

Io, dal mio abisso di miseria, non arrivo fino al Vostro Empireo. Per questo chiedo a te, che sei così vicino a Gesù e ai suoi legittimi e degni delegati, di presentare questo mio modesto contributo pro Sinodo – Commissione D (disastrati).

So che non sono mistico nel mio intervento sulla condizione disonorevole del clero. Spero almeno di essere chiaro. So anche che non tutti la pensano come me, ma so altresì che non tutti la pensano come voi.

Con tutta la deferenza che la tua alta carica mi impone, chinato al bacio del sacro Timbro, mi professo tuo umilissimo.

Basagliapenta, 9/11/1986 – tempo semi-forte e instabile –

Pre Antoni Beline, fascicolo personale n. 38/rb (rompiballe)

VIVI MÂL E MURÎ PIÊS

O ài apene finît di lei, su la Vite Catoliche, che di cumò indenant si fasarà lis robis in grant par chel ch'al riguarde la propagande pes vocazions (sore dut pai predis, mi à parût di capî). Chest al è mutivât di doi fats: il seminari in crassigne e la grande bugade sinodâl ch'a svinte a plene cane sul Friûl.

Alore ancje jo mi permet di dâ il gno contribût a cheste campagne promozionâl. A mût gno, che ben s'intint; ancje s'al stone dongje des declarazions mistichis dai gnûs predessuts.

O partis de muart di puar pre Romano, plevan di Foram. Nol covente tornâ a contâ cemût ch'è jè sucedude. O dîs dome che une muart cussì e jè la plui grande propagande contrarie che si puedi inmagnâ. Ce puedial pensâ un zovin di paîs, co al sint che ti àn cjatât muart un biât om, bon come il bon pan, ch'al viveve dibessôl tune barache? I vegnie voe di lâ predi?

Si disarà che ogni muart e jè brute e che, tai paîs, and'è tancj omps e feminis che ju cjatin muarts tal indoman o tal passandoman. Al pò capitâ ancje in Vatican. Però e jè une robe ch'e fâs pensâ. Parceche il câs di pre Romano al pò ripetisi par ducj o cuasi ducj i predis. Al podeve capitâmi ancie a mi, dal '78, a 37 agns, se no vevi la Nore, une puare femine sorde e mute di otant'agns che mi à viodût a stuargimi e a cainâ e che jè lade a clamâ in paîs.

O sai che la muart e jè Pasche. Ma in chestis cundizions culi jo no rivi a viodi plui in là di une lungje coresime che si finis cun tun Vinars Sant là ch'al è plui ce compatî e condolê che imitâ. Il mâl al è che i predis no dome a muerin dibessôi, ma a fasin une vite di cjan. E a diventin rabiôs. In alt e in bas, cuintri de istituzion che si sbonbe di lôr e cuintri de int «che jè triste e cence agrât, dopo tant che si à fat par lôr».

Come che in Cjargne a ogni muart di cristian si siere une cjase, cussì a ogni muart di predi si siere un canoniche. E un paîs al reste come vuarfin. Pôc dam, tratansi che il Spirtu Sant al è lui ch'al à di parâ indenant la barache. Però al sares miei che chei cuatri ch'a son restâts, a fasessin une vite dignitose e une muart «umane». Par lôr ben e pal bon non de tribù.

Un predi de mê foranie, fevelant di puar pre Romano, mi à dit: «Ce àjal di dî il vescul tal funerâl, tun câs cussì? No podèval amancul proponij di lâ a stâ in comunitât?».

Jo o vevi fevelât, une volte, cun pre Costantin e mi veve contât che i vevin sparferît di lâ a vivi in comunitât. Ma lui al à dite che al veve nant restâ tal so cjantonut, parceche no si cjatave te confusion, dopo di une vite di rimit. Resonade! No si pò migo dâj une sivilade a di un par ch'al leti a fâ vite comunitarie. E se no si sint? E se no si cjate? E se, come che nus àn fat a nô, j'àn batût e strabatût di sfogâsi dome «con Gesù e Maria»? E se, come che nus àn insegnât a nô nol veve di vê nissun amî, parceche a ere une robe periculose? «Miei salvadis che no purcjni», a disevin te lôr grande prudense.

La vite di comunitât no jè une robe che si pò imponile cun tune telefonade. Al sares come dîur a doi vedrans di paîs (mascjo e femine,

naturalmentri, so redut dopo dal befel di Ratzinger!): «Parcè no si cjoleiso?». No sarà migo cussì puare e sclagne la vite matrimoniâl, che si à di tirâsi dongje juste par no stâ un par bande! Par chel o dîs che, se un si sint puartât a restâ dibessôl, al à di vê ancje cheste possibilitât. E la diocesi e à di lassâj cheste possibilitât ma cence bandonâlu par chel.

O vin un esercit di voluntaris, une fulugne di catechiscj, une tanpiestade di laics plens di amôr di Diu e di prossin, un stragjo di sinodâi. Poben: parcè no si puèdial dî clâr e net ch'a viodin ognun dal lôr predi (e s'al è pussibil, ancje di ducj chei ch'a son dibessôl tal paîs)? Lâ a lavâi la massarie e a dâi une netade a di un vieli bavôs e stranp nol sarà cussì «gratificant» come un cors di alte teologie, ma o crôt ch'al seti plui de bande dal vanseli. Pò stâj ancje che il predi nol vueli vê int par cjase. Nissune maravee, cul mût che lu à tirât su. Ma intant si prove, si propon, si va a viodi. Dopo si podarà ancje dî ch'al è colpe il predi; ma no prime. Cumò no sin colpe nô, parceche no vin nissun che nus vierç la puarte. Ce varessio di metimi a fâ jo a Visepente se no ves la famee dai muini che mi dan di gustâ, che mi tegnin in sest la canoniche e che mi viergin la puarte e mi menin tal ospedâl cuanche no stoi ben, che mi sucêt ogni âtre dì? Jo o à miôr un plat di mignestre di vîf che no une biele predicje di vescul dopo muart!

O sai di fâle lungje, ma no mi capite di sbrocâmi ogni dì. I predis a son pôs e viêi e a vivin mâl. Vino ancje di fâju crepâ prin da l'ore? Cumò al sucedarà ancje in tal Plan ce ch'al sucêt di dopomai in Cjargne: che un predi al scuen fâ doi - tre - cuatri paîs. Esal possibil? Esal just? Esal uman? Esal cristian? Lassait che il predi al leti indenant cu la sô int, tacansi a un paîs. O voleiso meti su un «harem» (di parochiis, naturalmentri)? E là che nol è il predi ch'a provin a fâ la int. O ch'a cjapin la machine e ch'a letin a messe tal paîs dongje. Traj! A van a viodi l'Udinês cu la ploe e no puedin fâ une mie par lâ a messe? Alore si à di vê il coragjo di lassâju stâ. No si à di copâ il predi par no sconsortâ la int. Senò o restarin cence predis e cence int. Ogni paîs ch'al veti il so troput di int ch'a tegnin vierte la glesie a un'ore convenient e ch'a fasin un alc; ce ch'a vuelin e cemût ch'a puedin. Cul timp a impararan, e facilmentri a fasaran miei di nô, parceche e sarà une robe lôr, vuadagnade, e no butade te schene come cumò.

O sieri pensant a par don Abbondio, nestri bis-barbe. Al ere ce ch'al ere, però al ere plui fortunât di nô. Amancul par dôs robis.

Prin di dut al ere sigûr di jessi parât in alt te sô buine reson e al ere rispjetât de int parceche al podeve stropâur la bocje cul so latinorun. Robe che a nô no nus sucêt. Cualchidun al rive a parâsi anciemò talianant. Ma par furlan, se no si à reson, no si ur strope la bocje. Ch'al ûl dî che il predi nol à plui «autoritât». (E chest a mi mi sta benon).

La seconde furtune di don Abbondio a ere Perpetue. Ch'a podeve viergi il barcon e dîur a di chei ch'a çocavin che il predi al veve la fiere batecule e che nol podeve dâ udiense. Ancje se no ere vere. Invessit nô, ancje s'o vin la fiere o alc di plui penç, nus tocje restâ lì a spietâ la provedense o la muart. Ch'e e pò sei ancje chê une provedense, ancje se dure di glotile.

9/11/86

pre Antoni Beline, plevan di Visepente